

Daeng' va' mbu Bouxcuengh

□ Godoq comz hoiz



▲ Boudauh cangyiengh bwh yienj.

▲ Gyoengq bouxyienj cingq yienj yiengh "va' mbu".

◀ Gyoengq dauh baiyienj daeng' va' mbu.



▲ Foux va' mbu youq gwnz daizheiq yienj hix ndeyawj dangqmaz.



▲ Bouxswncienj cingq yienj foux daeng' va' mbu.



▲ Vunzlai caez yienj ciengzmienh ndeyawj.



▲ Vunz dangdieg haenqrengh lienh《Foux Daeng' va' mbu》.



▲ Canghyienjheiq son bouxcos yienj foux daeng' va' mbu.

Daeng' va' mbu Bouxcuengh hix heuhguh foux va' mbu fwngzbaed, dwg cungj foux ndawbiengz Bouxcuengh ndeu, giz hwnghoengh daeuz dwg Lungzanh Yen Yen' gyangh Cin, caemhcaiq lij youq Lungzanh Yen Cwngzsiengh Cin, Nazdung Cin, Gyauzgen Cin, Nanzhih Cin vanzlij Bwzswz, Bingzgoj daengj dieg riuzcienj, miz 200 lai bi nanz lo.

Daeng' va' mbu Bouxcuengh dwg boudauh(goengsae) youq hai ranzcai seiz vihliux hairon duzhoenz couh diuq duenh foux miz daegsaek dangqmaz ndeu. Youq dangdieg, doenghboux vunzgeq miz lwg miz mbwk, lwg lan rim ranz, miz caez gvaq ndei haenx dai roxnaeuz cangqmoh ne, vunz dangdieg cungj guh hozdung dajcaeq. Heijdaeuz guh hozdung gaxgonq an aen daiz bouxsae ndeu coq baihnaj baizhoenz bouxgvaqseiq, vanq caengz haeuxsan ndeu coq gwnz daiz, nda 9 aen vanj iq coq, henz vanj nem 9 limq va aeu ceij henj, hoengz, heu raed baenz haenx, yiengh lumj va' mbu gyaue-ndei. Ndaw vanj coq miz youz-duznamh roxnaeuz youzgyaeuq, coq geu daengcauj(roxnaeuz labcuk) diemj dawz, baiz baenz sam hangz gungh 9 aen daeng' va.

Dajcaeq gingciengz aeu 7 daengz 9 boudauh(goengsae), gyoengq boudauh daenj ndangdaenj gyaueudei, boudaeuz ndang daenj

buhdauh raez, gyauej daenj mauh-baed, hoz venj cawbaed. Gyoengqde youq baihnaj daizsae ngon ging gonq, doq ciengq doq daj ndaw fwngz gyoengq lwgsai hauq cieq yieng gvaqdaej baek coq gwnz daizsae, liuxle roq gyong roq laz baez dem baez, yienghneix guh soh daengz hwnj yieng liux.

Gvaqlaeng, boudauh(goengsae) hainduj diuq "foux daeng' va' mbu", gyoengqde fwngz gaem laz iq daengj doxgaiq, humx "daeng' va' mbu" gonqlaeng baiz baenz coij, gyoengq dauh roq gyong roq laz, boudauh daeuz youq ndawgyang vunzlai cieng bae ciengq dauq, mboujduenh bienq yiengh ndang. Caemhcaiq yungh fwngz, gen, lwgfwngz fan ciengq mbouj daengx, bienq ok hauilai cungj yiengh foux...gyoengq dauh diuqfoux de diuq duenh ndeu liux, couh daengz duenh 6 aen foux fwngzva doq ciengq doq diuq haenx, caemh dwg youz boudauh ciengq caeuq diuq, gyoengq boudauq riengz sing caez ciengq, roq doenghyiengh guhbuens. Ceiqlaeng, gyoengq dauh diuqfoux haenx youh diuq gij foux "genva fwngzbaed" bienqvaq lailai haenx, daihgaiq bueng aen cung, "foux daeng' va-mbu" diuq sat lo.

Gij daeng' va youz ban dauh ndawde boux rox dinfwngz haenx guh, yiengh ndeyawj, diemj rongh

seiz ronghliklik bae, lwenqda dangqmaz.

Ginggvaq bienqvaq, "foux daeng' va' mbu" seizneix mboujdan lij youq ndawbiengz riuzcienj, hix baenz le gij foux ndawbiengz Bouxcuengh miz daegsaek lailai ndaej hwnj daizheiq yienj haenx. 20 sigij 80 nienzdaih duenh satlaeng, 《Foux Va' mbu Fwngzbaed》caemgya Nanzningz Digih vwnzyi comzyienj, dangseiz couh ndaej vunzlai haen-ndei, doxdax ndaej it daengj ciengj. Bi 1990, Lungzanh Yen Vwnzva-gvanj doi《Foux Va' mbu Fwngzbaed》camgya Nanzningz Digih foux ndawbiengz doxdax, ndaej gij hanghmoeg cau foux, yienj foux sam daengj ciengj.

Ginggvaq geijcib bi lai baez gaj bien, 《Foux Va' mbu Fwngzbaed》youz gaxgonq bouxdog yienj bienq-baenz vunzlai yienj, youz gaxgonq bouxmbwk yienj bienq daengz seizneix sai mbwk caemh yienj. Bi 2011, Lungzanh Yen Sinhhingh Segih gaj bien 《Foux Va' mbu Fwngzbaed》le yienj hwnj daizheiq hung, caemhcaiq gaj mingzcoh baenz 《Daeng' va' mbu Fwngzbaed》, baez foux youz 16 bouxyienj diuq haenx, dwg baez "fouxva' mbu" ceiq hung ndeu. "Daeng' va' mbu" cungj yisuz ndawbiengz gaeuqgeq neix, ginggvaq gajbien gyagoeng le, caiqlj fat rongh engq lwenqda.